

Minister Hooyboer-Winklaar:

“Den tur skina di nos comunidad a duna atencion na nos dia nacional”

ORANJESTAD - Tur esunnan cu tabata riba Plasa Betico Croes of cu a sigui e cobertura via television ta di acuerdo cu e manifestacion cultural tabata uno di masha nivel. Ta despues di hopi aña cu nos isla a conoce un evento asina bon organisa y produci. Sin ningun duda, nos cultura a briya diadomingo anochi. Minister Michelle Hooyboer-Winklaar, Minister di Asuntunan Economico, Asuntunan Social y Cultura a splica cu pa e ultimo tres añanan aki a scoge pa tene un gran manifestacion cultural como antea-sala di Dia di Himno y Bandera riba dia 17 di maart. A scoge pa un manifestacion cultural principalmente pasobra expresionnan cultural, den forma di musica, canto y baile ta e forma mas bunita cu por tin pa rindi honor na nos dia nacional, segun Minister Hooyboer-Winklaar. Pa e aña aki e decision a cay hopi tempran tocante e programa cu lo presenta. E mandatario ta splica cu el a presencia e concierto di celebracion di e 25 aniversario di UNOCA algun luna pasa, el a keda sumamente impresionado y mesora a acerca UNOCA cu e peticion pa duna comunidad e regalo musical aki durante e manifestacion cultural anual. “E concierto aki ta unico y ta conta cu participacion di un gran cantidad di cantante local. Y den cuadro di celebracion di Aña di Papiamento, e concierto ta duna un toke ex-



tra como cu tur composicion ta local y ta na Papiamento,” Minister Hooyboer-Winklaar a subraya. “E aña aki nos ta sinti cu den tur skina y den tur sector di nos comunidad atencion a wordo duna na nos dia nacional, nos Dia di Himno y Bandera,” e minister a bisa, resumiendo diferente evento y celebracion cu a tuma luga. Durante e gran siman di celebracion a presenta un buki

dunando reconocimiento na nos antepasadonan cu ta forma e fundeshi di nos Status Aparte riba Plasa 18 di Maart, a inaugura Community Museum na San Nicolas, a celebra reapertura oficial di e trabounan di renobacion na Watertoren San Nicolas, y a celebra apertura oficial di Linear Park. Banda di tur e eventonan aki, tabatin competencianan deportivo den tur



distrito. Ademas, riba 18 di Maart tur Museo a habri pa yama henter comunidad di Aruba un caluroso bonbini. Minister Hooyboer-Winklaar a felicita y expresa un gran aprecio pa tur persona y organisacion cu a haci e celebracion di Dia di Himno y Bandera 2013 grandi den su discurso pa introduci di manifestacion cultural riba Plasa Betico Croes. El a haci men-

cion special di Comision Celebracion Dianan Nacional, UNOCA, Departamento di Cultura y tur scol na Aruba, cual a haci un trabao fabuloso den transmiti e mensahe principal di amor pa Pais Aruba y con pa duna respet na nos bandera, nos himno y tur local tin rond di nos. Riba potretnan por mira parti di e bunita celebracion cu tabata tin. □

